

Ашъарий ва Мотуридийлар адашганларми?

05:00 / 07.03.2017 4548

«Бу сарлавҳадаги гап ихтилофчиларнинг ҳозирча унчалик тарқалмаган гапларидан бири ҳисобланади. Улар ақийда масаласида бир неча ихтилофларни қўзғаганлар, аммо ҳозирча бу борадаги ихтилофлари асосан ўзларининг орасида қолиб келмоқда. Аммо «Ашъарий ва Мотуридийлар адашганлар», деган гап ўта хатарли бўлганидан ва савол келиб турганидан бу масалани ҳам ёритиб қўйишни маъқул кўрдик.

Савол: Ассалому алайкум, Устоз! Яқинда чиқарилган «Усусул ақийда» номли китобни шарҳ қилиш жараёнида Ашъария ва Мотуридия АДАШГАН секта сифатида зикр килинганини эшилдим (аудио дарсни эшитиш вақтида). Масала ақийда бобида кетаётгандиги учун, сиздан Ашъария ва Мотуридия ҳақида тўлиқ маълумот сўраяпман. Ашъарий ва Мотуридийларнинг адашган жойлари бўлса, улар нимада адашишган, агар адашмаган бўлишса, ҳужжати қандай ва ниҳоят, ўзи қайси масалаларда Ашъария ва Мотуридия адашган, деб ҳисобланади. Имкон қадар мени қийнаётган саволни тўғри шакклантиришга ҳаракат қилдим, агар савол тузишда камчилигим бўлса, умид қиласманки, Аллоҳ учун камина биродарингиз ҳақида яхши гумонга боргайсиз. (Агар бу маълумотни каердан олганимни билишни истасангиз, ҳаракат қилиб, китобнинг номини, нашриётини, муаллифини излаб-топиб, аниқ келтириб беришим мумкин!) Жавобингизни кутаман.

Жавоб: Саволингиз ақийда масаласига тегишли бўлгани учун бир оз муқаддима келтиришга тўғри келади.

Имом Ғаззолий Аҳли сунна вал жамоа ақийдавий мазҳабининг тарихи ҳақида сўз юритиб, қуидагиларни ёзади: «Калом бир илм бўлиб, унинг мақсади аҳли суннанинг ақийдасини аҳли бидъатнинг ташвишидан муҳофаза қилиш ва қўриқлашдир. Аллоҳ таоло Ўз бандаларига Ўз Пайғамбари тилида ҳақ ақийдани илқо қилди. Унда уларнинг дини ва дунёсининг салоҳи бордир. Шунингдек, унинг ҳақида Қуръон ва хабарлар нутқ қилди. Сўнгра шайтонлар ўз власвасаси или бид-ъатчиларга суннатга хилоф ишларни илқо қилди. Улар ўша ишларни гапирдилар ва аҳли ҳақнинг ақийдасини бузмоқчи бўлдилар.

Бас, Аллоҳ бир тоифа мутакаллимларни пайдо қилди ва уларнинг ҳимматини тартибга солинган калом ила суннатнинг нусрати йўлида ҳаракатга солди. Шу орқали аҳли бидъатнинг суннатга хилоф равишда чиқарган алдамчиликлари фош қилинди. Ана шундан илми калом пайдо бўлди».

Бу гапларга қўшимча қилиб айтамизки, илми калом пайдо бўлган вақтга келиб, ақийдага оид масалаларга аввалги вақтлардагига ўхшаб, фақат Қуръон ва Суннатдан далил келтиришнинг ўзи кифоя қилмай қолган эди. Қарши тараф ақлий далил ҳам келтиришни талаб қиласарди. Калом масалалари бўйича баҳслар мусулмон оламидаги ўша вақтнинг кўзга кўринган ақийдавий мазҳаблари – Аҳли сунна вал жамоа, мўтазилийлар, муржиъийлар, хаворижлар ва шиалар ўртасида бўлган.

Кейинчалик Аллоҳнинг каломига тегишли баҳслардан Аллоҳнинг сифатларига, Ислом давлати бошлиғи – имомга оид масалаларга, қазо ва қадар масалаларига ва ҳатто баъзи фиқҳий масалаларга ҳам ўтган.

Вақт ўтиб, турли ҳалқ ва тоифаларнинг Исломга кириши билан бирга, уларнинг ақийда ва фикрлари ҳам мусулмонлар орасига кириб келди. Шу билан бирга, ғайримусулмонлар томонидан Ислом ақийдаларига қарши фикрий хужум ва танқидлар ҳам авж ола бошлади.

Ана ўша ҳамлалардан Ислом ақийдасини ҳимоя этиш ва уларга раддиялар қилиш учун илми калом соҳиблари ғайримусулмонлар билан тортишувларни бошладилар. Бу ишда Аҳли сунна вал жамоа уламолари ҳам, мўтазилалар ҳам ва бошқалар ҳам иштирок этдилар.

Аввал бу тортишувлар тўғри йўналишда ва бир маромда кетди. Кейинчалик эса бошқа илм ва соҳаларда бўлгани каби турли бурилишлар ва хатолар юзага кела бошлади. Илми калом бобига турли-туман бўлган-бўлмаган масалалар аралашиб кетди.

Шунингдек, мутакаллимлар орасига ҳам ҳар хил шахслар аралашиб кетди. Натижада ҳақиқий илми каломни соҳтасидан, ҳақни ботилдан ажратиб олиш қийин бўлиб қолди.

Ана шундай оғир бир пайтда соғ Ислом ақийдасини сақлаб қолиш учун ҳаракат қиласиган уламолар етишиб чиқдилар. Улар Қуръони Карим ва Суннат таълимотлари асосида, Пайғамбар соллаллоҳу алайҳи васалламнинг сахобалари услубида ақийда масалаларини ёрита бошладилар. Уларга Аҳли сунна вал жамоа номи берилди.

Кейинроқ одамларга тушунарли бўлиши учун матнларни таъвил қилишга ҳам мажбур бўлинди. Турли китоблар битилди. Аҳли сунна вал жамоанинг ақийда бобидаги таълимотлари тўпланиб, тартибга солинди. Охири келиб ақийдавий мазҳаб бўлиб шаклланди ва ўз имомларига ҳам эга бўлди.

Аҳли сунна вал жамоа исми бундан аввал ҳам бор эди. Аммо кейинроқ юқорида номлари айтиб ўтилган турли фирмаларга муқобил ўлароқ айни шу исм ишлатила бошланди. Аҳли сунна деганда суннатга юрганларнинг йўли ва ҳадисга амал қиласиганлар кўзда тутилган.

Имом Ашъарий ва Мотуридийлар Аҳли сунна вал жамоанинг ақийда бўйича имомлари деб тан олиндилар.

Бу икки имом Ислом оламининг икки тарафида – Ашъарий басралик, Мотуридий самарқандлик бўлса ҳам ва бир-бирлари билан кўришмаган бўлсалар ҳам, бир хил ишни бир хил вақтда, бир хил тарзда адо этганлари ҳамда икковларининг бирданига Аҳли сунна вал жамоа мазҳабининг имоми деб эътироф қилиниши бу мазҳабнинг ақийдаси барча юртларда ҳар доим маълум ва машҳур эканига ёрқин далилдир.

Шайх Муҳаммад Содик Муҳаммад Юсуф

(Мазҳаблар бирлик рамзи китобидан)